

Sembahyang Itu Mi'raj Orang Yang Beriman


Baharu sahaja aku selesai mengerjakan sembahyang Isyak dan doa tasbihnya. Sungguh nyaman dan nikmatnya seseorang yang menunaikan sembahyang dengan sebenar-benarnya, dan sungguh indah apabila seseorang mukmin mendapati dirinya menghadap bulat-bulat kepada Allah 'Azza wa Jalla lima kali sehari semalam.

Sembahyang ini ialah anasir yang sejati di dalam jadual pendidikan bagi hati manusia "di bumi", menjadi tiang kehidupan rohaninya ketika dia berpindah-pindah dalam segala jenis hawa nafsu dan hajat kehendak jasad serta perhiasan-perhiasan hidup yang menggoda.

Nyatalah tujuan sembahyang yang demikian tingginya, adalah mentafsirkan perhubungan firman Allah "*Qum al-layl*" (berdirilah kamu sembahyang pada malam hari) dengan firman-Nya: "*Inna laka fi al-nahāri sabḥān ṭawīlān*" (Sesungguhnya bagimu pada siang hari banyak pekerjaan), sebagaimana yang tersebut di dalam Surah al-Muzammil.

Tetapi sayang! Banyak orang-orang Islam tidak mengerjakan sembahyang menurut keadaannya yang sebenar. Kalau mereka mengerjakannya sebagaimana semestinya, nescaya sembahyang ini menyedarkan mereka kepada diri mereka dan kepada Tuhan mereka dengan penyedaran yang sempurna, selamat dan berkat.

Allah 'Azza wa Jalla yang telah memfardukan sembahyang itu pada "malam mi'rāj" yang berbahagia, dan memerintahkan



junjungan kita Muḥammad *ṣallā Allāhu 'alayhi wa sallam* ketika berada di atas "*Sidrat al-Muntahā*" supaya ia dan umatnya mengerjakannya, maka hakikat ini berkekalan terus menerus, menjadikan roh melalui perhubungan itu meningkat "naik mi'rāj" ke hadrat Allah Ta'ala.

Benarlah Rasulullah *ṣallā Allāhu 'alayhi wa ālihi wa sallam* yang bersabda: "*al-Ṣalātu mi'rāju al-mu'min.*"

"Sembahyang itu ialah *mi'rāj* – tangga – orang yang beriman!"

(Dari buah kalam al-Ustadh Sa'id Ramaḍān)

